

JATIBIAINOA JONÍ COSHIBAON, JASCAASHON JACON JAHUEQUL ARESTI JONIBAON JAHUEQUESCAMABÍ ITIAQUIN SHINANA

Jascarabo ashonra ja Naciones Unidasnin joni coshibo tsinquishon, jatíshonbi shinanshon, jatíbiain janbíssacana iqui, ja diciembre oshe chonca neteyatian, jainoash 1948 baritian.

Ja shinancana joibora rebestanquin huishacana iqui, ja quirica pei meran icóbo. Ja aquin senenhas“honra ja tsinquitabaon, jatíbiainoa joni coshibo yoia iqui, ja shinancana joi jatíbiain janbíssacanti; yoyo ashon, jahueraquí icórin ishon 9nancanon ishon. Requemparira onancanti iqui escuelancoshon, jahueranoqui quirica acanai, jains“honbo. Huestíorashonbi onanyamatira yamaque nato joi, jatíshonbi onancanti riqui; huetsa apoya jonibo ishonbi, jainoas jato namanri icó mainmea is'honbi; huetsa quesca jonibaonbira onantiqui.

JA JOII ICÁBO ONANTI

ICONSHAMAN SHINANSHON SHINANA IQUL, jatíbi noa mescó jonin baquebo, jascara iquetian huetsabaonribi noa joi nincóshonti iqui. Jaticashbira jacón jahuéqui ati shinanya itiqui. Jatíshonbi moa nato jahuéqui onancanquetianra, jacón jahuéqui aresti tsonbi noa pecóiriamatima iqui; tsonbi noa yancabires jahueatima iqui; jatian jacomma masó teneti nato neten yamatiqui, ja onancanquetiampari.

ICONSHAMAN SHINANSHON SHINANA IQUL, jonibaon jacomma shinanshon huetsabo jaton aresti shinan amayamaa iqui. Jascara shinancanainoasha, jonibaon jahuéqui acainbi huetsabaon jacommaanresa iqui. Ichara jacanque, huetsaboqui jacomma shiroaibo, yoina quescaquin amisaibo, jascaashon jatíbi joni rabinmai.

Icashi rama iqui joibo moa janbíssacana, jacaya jonin quiquinbiresaquin manaa jahuéquibo, jaqui coshinoshon. Jascara copí iqui huetsa joniboquibires raquétan jatima nato neten. Jainoas'h huetsabaonribi mia yonoquin onitsapi imatima iqui, noibatibires j ahuéquiomashoco mia jatima iqui.

Jainoash jatíbi jonira raquétan itima iqui yoyo iqui jahuen queena joi yoií, ishonbi huetsabo jaton shinan jacommaamatima iqui, ja yoyo icatonin. Jainshon ati iqui queens'hon Diosen joi iconhaquin, iamashon jahueratocayaqui jan oinna icon joi iqui ishon, ati iqui iconhaquin.

ICONSHAMAN SHINANSHON SHINANA IQUL, ja jonin baquebaon ati jacón shinan japaricaya senenhati jahuequescamabi iquetian apon esecan jato aquinti iqui; ja jacomma shinanya jonibaon ja pecóritaanon jonibo masó tenematimaaquin, jaton aresti shinan jahuequescamaribi iquenbi jato amayamanaquetian. Ja shinan iqui jatíbi jayó iti. Jatian moa jascara masó jahuéqui teneti atipanyamaash ja jacomma shinanya joni betan reteananai, jacón icasi.

ICONSHAMAN SHINANSHON SHINANA IQUL, japaricaya non senenhati jahuéqui, huetsa main icó jonibo betan jaton apobo betanribi noa jacanananash jati.

ICONSHAMAN SHINANSHON SHINANA IQUL, ja jatíbi jonibo ja Naciones Unidas tsinquítiaín icóbaon yoicana iqui huestíora Quirica Huishó meran; huestíora huestíorabo iqui jahuequescamabi jaton queena jacón jahuéqui aresti. Jainoash jatíbi joniboribi iqui jahuequescamabi, yoyo icaítian huetsabaon nincórestí. Ja huestíora jonibo iqui jahuéqui ati shinanyabo, jainoash ainbobo jascóribi iqui benbo quescóribi. Ja Quiricaninra yoicana iqui, jatíbi jonibo aquinti, jaticashbi jacónash jacantiaquin; jainoash jaton icóbo jacóni beboncatiaquin, jatian bebon quirica onanribi icantiaquin.

ICONSHAMAN SHINANSHON SHINANA IQUL, ja huetsa maimeabo ja Naciones Unidasnin coshíbaon aquinananoshon yoicana iqui, ja jatíbi nato maimea jonin jaton aresti jacón shinan senenhacanon ishon, jahuequesca ishon huetsabaon jascara shinan pecóori amanaquetian.

ICONSHAMAN SHINANSHON SHINANA IQUL, ja yoia senenhaquin jatíbi apobaon requenpari ati iqui, jatíbi jahuen jónibo onanmaquin, huestíora huestíorabo. Non jacón jahuéqui acaitian huetsabaon noa oinrestiqui noa onsatanquin. Jaton queena jahuéqui arestira jahuequescamabi iqui, ja shinanra tsonbi pecóori atima iqui.

Jascarabo iquetian shinans'honra

JATIBIAINOA JONÍ COSHIBO TSINQUISHON

NATO HUISHACANRA ONANTIAQUIN YOIAI JA JONIN BAQUEBAON JACON JAHUEQUL ARESTI SHINAN iqui jaticashbi ja shinanya iti; huestíorabira ja shinanhoma itima iqui nato neten. Huetsa maimea apobaonra jahuen jonibaon jascara jacón shinan aresti onanshon senenhati yoiti iqui, jatíbiain. Jascara acantira jato jatíbiain yoiti iqui, escuelancoshon jato asheacanon ishon, jainshon jato queshanquin rebesti iqui, jatíshonbi onancanon ishon; jainshonribi onancanti iqui, jascatash ja esébo onanas'h noa jati.

ARTICULO 1.

Jatíbi joninra huetsa jonibaon yoiai nincórestí iqui, jahueraquíbi jacomma imaquin; jainoash jahuen queena jacón jahuéquibo ati jahuequescamabi iqui, tsonbira amayamatima iqui. Jaticashbira jascara aresti jacón shinanya iti jahuequescamabi iqui, jahuequescarainoash picota joni inonbi. Huestíora huestíorabora jahuéqui ati shinanya iqui; jainshon onanribique jahueratoqui jacón iqui jainoash jacomma iqui ishon. Ja copira huetsa jonibires inonbi non jato jacónharesti iqui, non huetsabi non acái quescaquin.

ARTICULO 2.

Jahuequescashonbira tsoabi non amayamatima iqui nato Huishó meran yoia quescó acasaitian, benbo iamaash ainbo inobira non jato amaresti iqui. Jainshonra non amaribiti iqui huetsa quesca jonibo inonbiribi, jahuequesca jisó yoraya iquenbi; jahuequescati yoyo icai inonbi; jaton acótoninbiribi Diosquiriti icó joi iconhacanaitian jato amayamatima iqui; huetsa apobires chibanaibo inonbi, jahuen. El shinanbiribi huetsaresibi iquenbi; huetsa maimea joni inonbi; jato namanrí quiquinmashoco inonbi, jahuéquioma joni inonbi, huetsa jahuéquibires inonbi jato amayamatima iqui, jatíbi jonibo.

Jainshonribira non jato amayamatima iqui, jato namanbires icó mainconia joni, jainoash huetsa mainconia joni inonbi, non jato amaresti iqui.

ARTICULO 3.

Huestíora huestíorabora jati jahuequescamabi iqui, tsonbira retetima iqui, jainoash jahuen queena jacón jahuéqui ati. Jainoashshibi quiquinbiresi jatoqui chipoti iqui, tsonbi jacónmatima shinanash.

ARTICULO 4.

Tsoabira itima iqui copí biimabi huetsabores ashoni yanca yonocaati; quiquinbires atima jahuéqui riqui, joni iboashon inaati.

ARTICULO 5.

Tsonbira huetsa joni, yoinna acái quescaquin jacónmaquin masó tenemati yamaque.

ARTICULO 6.

Huestíora huestíorabora huetsa jonibires acái quescaquin jacónhaquin apon ati iqui, jahuequescarain joni caa inonbi.

ARTICULO 7.

Ja non mainmea esé copira apobaon jatíbi joni huetsabo acái quescaaribaquin shinanti iqui. Jainshon jato coiranti iqui, huetsa quesca jonibo inonbi. Jainshonnbira coiranti iqui, huetsabaon jatíribibo jaton queenabo nato Huishó meran yoiai quescó acasainbi amayamanaquetian.

ARTICULO 8.

Jahuetianqui huestíora joni yancabires jacónmacanai apon esé meran yoiai quescómaaquin jara jahuequescamabi iqui, coshíboiba ja cati. Ja joni coshíbaonra aquinti iqui, ja huetsabaon yancabires j aconmaitian.

ARTICULO 9.

Tsonbira yataanan córcel meran huetsabires niatima iqui, ja apon esecan yoiai quescóma acó onanshonmabi. Jainoash jahuen mainmeashbi tsoabi potaacatima iqui, apon esecan yoiai quescóma jacomma acóma icós'h.

ARTICULO 10.

Huestíora jonin jacomma acó yoicanquetianra, jahuequescamabi iqui, ja apon jascaati yoia acaiton jato yocóyompariti, iconmeinqui ishon onannoshon. Jainoash jonin yoíabi huetsa yoitimaitianra, jahuequescamabi iqui, ja apon jascaati yoia acái joniiba queenash jabo cati, jan aquinnon icash. Jahuequescamabiribi iqui ja jonin icha naposhon jato beshoshonti, ja copí icanai jahuéqui. Jascaashon onantí iqui, jahueratonacayarín ja yoia joi icon ishon jainoash jahuerato jahuéquiboqui apon esé meran yoiai quescóma iqui ishon, onónshon. Ja apon jascaati yoia acái jonin jato beshoashonti iqui senenbires, huetsa quesca jonibo inonbi. Jainshon huetsabicho aquinshon huetsa aquinyamatima iqui. Jahuequesca ishon jahuen onana joni iquetian ati iqui jabicho aquinquin. Jainshon aquinon is'hon copíaa iquetianbiri, jahuequesca is'hon huetsa jahuéqui copíboribi; ja apon jascaati yoia acaiton jato jascaatima iqui, senenbirescaya jato aquinti iqui.

ARTICULO 11.

Huestiora jonin jaconma acó yoicanquetianra joni coshibaon shinantimapari iqui, acona riqui ishon. Jascaashon huetsabo ja oinnabo yocódympariti iqui, aconarin iamaash acómarin ishon onónos'hon. Jascara jonira bamaacanti iqui joni icha sharanshon, ja apon esecan yoiai quescaaquin, jatianra coshibaon acona onanshamanshon bamaati iqui.

Jainshon huestiora jonin atiqui huestiflora jahuéqui ja atima apon esecan yoimapari jahuéqui. Jatian moa jascara acó pecóo apon esé picoti iqui, jascara jahuéqui jahuescashonbi atima; jatianra apon ja joni masó tenematí yamaque, jascara esé picotamatian acó iquetian. Jainshonribira jato ati iqui masó tenemaquin, ja jaconma aquetian masó tenemati apon esecan yoiai quescóres. Jainshon moa jascara jaconma acó pecóo, huetsa esé apon picoti iqui, jascara jonibo bebonbires masó tenematí; jascara iquenbi ja benó esecan yoiai quescó atima iqui, jascara esé picotamatian acó iquetian.

ARTICULO 12.

Tsoabira huetsabaon jahuéqui acai sharan niacaatima iqui icasquin jato yocatashmabi. Jainoash jahuen rarebo sharanbira itima iqui yocatama icóshbi, niacaati. Jainoash jaton s'hobonbira itima iqui jiqui, jiquicasquin jahuen ibobo yocatashmabi. Jainoashshibira, huetsabo quirica bemacana jahuen ibo yocatamashonbi jahuetianbi yoyo atima iqui. Jainoash huetsabo yoií jaconmai itima iqui; jaton icóribira jaconmaquin yoinaantima iqui. Jascara jahuéquibo huestiora joni acanaitianra apon aquinti iqui, jaquiribi ahuetságamacanon ishon; jainshon jan acó joni masó tenemashontiqui ja acó copi, ja apon esé meran yoiai quescaaquin, huetsa quesca jonibo inobira jato apon aquinti iqui.

ARTICULO 13.

Ja icó maincobi icasbhi huetsancobo joni catira jahuequescamabi iqui. Jainoash jahueranoqui jatin queenai, jahuen queenai mai catótira jahuequescamabi iqui.

Huestiora huestiorabora ja icó maimeash queenaash huetsa main caí picóti jahuequescamabi iqui. Jainoash huetsa main caash jaquiribi jahuen mainco joribatira j ahuequescamabi iqui.

ARTICULO 14.

Ja icó maincos'honbi joni jaconmaquin acanara jahuequescamabi iqui, huetsa main caash jainoa apoqui chipóti. Jascataitianra jainoa apon aquinti iqui, jaconhain jatiaquin.

Icashbi jaconma jahuéqui aquetian, jainoash nato Naciones Unidasnin yoiai quescó esé senenhayamaquetian, jaconmaquin acana caquetianra, huetsa maime aponbi jain imatima iqui, jahue jahuéquibira menitima iqui.

ARTICULO 15.

Huestiora huestiorabora jahuequescamabj iqui jaton icó mainconia jonishamanbi ití.

Jahuen mainmea apon esé senenhaitianra, jainoa apon shinantima iqui, moara nato mainmea iqui ishon. Jainshon jahuen aresti jacon shinan pecóoriamatima iqui, jahuéqui acasaitian amayamatima iqui, jahuen queena abónon ishon. Jainoash, joni tashquetash huetsa mainmea icasai tianra, tsonbi imayamatima iqui.

ARTICULO 16.

Moa anii senenas'h jatíbi joni, ainbo benooma jainoash benboribi huanooma jainoashibi benomaata ianan huanomaata icósha jaton queenbo be tan bianananti jahuequescamaj iqui; icasbhi potóbicho, jascatash jati iqui jatonbiribi. Mescó jiisa jóni iquetian oinshonra tsonbi imayamatima iqui, huetsa mainmea jóni iquenbi; Diosquiriti icó mescóas'hon joi iconhai joni iquenbira imati iqui. Ja benbo huanooma ianan ainbo benooma, jainoash benomaata betan huanomaatabo icósha, jahuequescamabj iqui, jahuen queenbo betan bianananti; icós'hbi potóbicho ja ainbaon benbon acai quescóribiaquin shinanaitian. Ja moa biananashonra, ja rabéshonbi jaton queena jacon jahuéqui aresti jahuequzscamabi iqui. Jatíbi jonira ainbo betan benbo inonbi moa biananana pecóo, jahuequescamabi iqui potaanaribiti, jascatash potaananti apon esé meran yoiai quescó iquetiamparies.

Tsonbira huetsa joni, ianan ainbo inonbi teaboshon biananamatima iqui, ja bianananti quiquini queencanamapari iquetian.

Jonibo sharan riqui non papa, tita jahuen baqueboya, ja iqui huestiora rarebonin tapon, jainoash rarebo peocootash caitai icósh. Jahuen papa betan jahuen titanra baquebo asheati iqui, jahueratoqui jacon iqui, jainoash jahueratoqui jaconma iqui ishon; jaton papan jascaá jatíbi onani jonin baquebo beboncaresti iqui. Tsonbira jahuen papa betan tita yocatamas'honbi baque bichintima iqui, onanhanonshon, iamaas'h yometsoquin. Huetsabaon jascaai jonibora apon aquinti iqui, bichincantimaquin.

ARTICULO 17.

Huestiora huestiorabora iti iqui jaton mai iboaabo; jainoash huestioratoninbicho iboaabi jahuequescamabi iqui, jainoash ichashon iboati jahuequescamaribi iqui.

Tsonbira huetsa jonin iboaá jahuéqui bichintima iqui, yancabires, jahue jahuequi copimabi.

ARTICULO 18.

Huestiora huestiorabora jahuequescamabi iqui, jahueratoqui jan shinana icon iqui ishon shinanshon joi iconhati. Jainoash jahuen queena quescaashon mescóashon Dios rabiti. Jainshon jan iconhai joi jeneshon, huetsa joi ja icon jisá iquetian shinanshon ja joi chibanara jahuequescamabj iqui. Janbichoshonbi iamaash ichashon inonbi jan iconhai joi huetsabo onómatira jahuequescamabj iqui. Jatora onanmati atipanke asheaquin, jainshon jahuen icótonin, jainshon jascaashon rabiaitonin, jainoash ja joi chibanai icósh jascara ití ishonquin.

ARTICULO 19.

Huestiora huestiorabora jaton shinanabobiribi yoyo iti jahuequescamabi iqui, jainoash jan shinana quescóbobiribi jato yoíti. Tsonbira huetsabo jaton shinanabiribi yoyo icaitian jaconmaanrestirina iqui. Jainoash huetsabaon shinana joibo onanti jainoashshibi huetsabaon jaton shinananbi huishacana, jascarabo onancantira jahuequescamabi iqui. Jainshon jahuen shinana joibo j atíbiain jato asheatira jahuequescamabj iqui, j ahuequescaaquinqui jato as'heacasai, jascaashon jato ati. Jainoash huishacanribi, shinamanbi jato yoianan, radio meran, jainoash huetsa jahuéquininbires inonbi jato asheati, jahuequescamabi iqui.

ARTICULO 20.

Jatíbi jonibora huetsanconiasbires jainoash huetsabo betanbires jaton queena ati shinanosh tsinquti jahuequescamabi iqui. Jainoashshibi huetsabo betan rabéshon jahuéqui atira jahuequescamabj iqui; icasbira ja tsinquishon jaconmamisti picocanaincorea itima iqui.

Tsonbira huetsabobires teashon jato betan rabéti imatima iqui, queenyamacanaitian

ARTICULO 21.

Huestiorahuestiorabora jahuequescamabí iqui jaton maimeash coshi jiquiti. Itira atipanke ichashon apo imacana, iamaash jabiribi ponteshon imacana. Jainoash huetsabo betan jaton coshi catótira jahuequescamabi iqui.

Huetsabaonbires ati jahuéqui, jonibaon jaton jeman icó arestira jahuequescamabí iqui; nescaraincobo, caritiran niti, plasain yacóti, caron pasiani cati, jainoash huetsa quesca jahuéquibires ati inonbi atira jahuequescamabi iqui.

Jaton queena quescóshamanhaquin coshibo ishon jan jato ashonti joni catócantira jahuequescamabi iqui. Ja moa anii senena joniboresa iti jahuequescamabi iqui, jainshon jonibo coshi imanoshon catótiain jiquishon, jahuerato joniqui jahuen coshi itin queenai ishon jonéshoco yoiti. Jahuetianbira huetsabo teashon ja coshi iti jonibo jato catómatima iqui; jaton queenmanbiribira ati iqui ja imati catóquin. Jahuerato joniqui ichashon ja catócana iqui, ja jonira iti iqui coshi jiqui, jatishonbi imacana.

ARTICULO 22.

Jatíbi joni jahuéquiom a itin raquétimara jahuequescamabi iqui. Huestiora mainmea jonibaonra ja maimea jonibo onitsapitaitian aquinyamatima iqui, jascaashon joni coshibaon aquinti yoiai quescaashon. Jainshonribira huetsa maimeabaon aquinti iqui, huetsa mainconiabo onitsapitaitian, jainoabaonbi aquinabi mashcórescanquetian. Jonibaonra huetsabo aquintí iqui, jahuéquinin mashcócanaincobo. Jainshonnbira aquincanti iqui jaton tee benati, jatonbinis'h teetash jacannon ishon; j ainoas'h jascatash jati bens hocaacanon ishonni.

ARTICULO 23.

Jatíbi jóni teetira jahuequescamabi iqui, jainshon jaton queena tee benatiribi. Jainoashshibi jaconash teetfain teetira, jahuequescamabi iqui, jainoash queenash teenoshon benashon nocotira, jahuequescamabi iqui.

Jatíbi joninra ja teebires aquin huetsan biaitiiribi copí bití jahuequescamabi iqui. Jahuetianbira jato teemashon rnescóaquin jato copfatima iqui, jahue jahuéqui copibi, huetsaresibi joni inonbi, ainbo inonbi; jainoash huetsa jahuéqui copibi atima iqui, jato jascaaquin.

Jatíbi teetai jonin jahuen copí senen bitira jahuequescamabi iqui; jan jahuen ahuin betan baquebo j ahuéquiamati; jahuenbi mashcóyamanon ishon. Jahuetianqui jaconma jahuéqui huinotai jaqui chipóti; jainoash jahuetianqui huestiora jahuéqui jan mas'hcóyora aacasabi jahuen copí biabi senenyamai, jascarabora apon eséain yoiai quescaaquin aquinti iqui.

Huestiora huestiorabora jahuequescamabi iqui jaton Sindicóto acanti (Sindicóto- ichaash rabécana jahuéqui anosh) iamaash huetsabo betan rabetaires jaton tee jacon inon icósh, itira jahuequescamabirib(iqui.

ARTICULO 24.

Jatíbi jonira basí teetash tantití jahuequescamabi iqui, jahuen tee jenepariash. Jainshonribira jato nete shehuinmaquin teematima iqui, netetiibi. Jainshonra jahuetio basichaa moa teemashon tantimati jahuequescamabi iqui; ishonbi ja teeyamai neten huetsatianbo copíati iqui.

ARTICULO 25.

Jatíbi jonira jahuequescamabi iqui, jan jatiatani iti, jan jahuen yorabi jainoas'h jahuen ahuin betan jahuen baquebo isinaitian raomeemati senen; jan piti bití senen; chopa bití; ja shoboati senen; benshoamisbo raonmashon jan copíati senen; jainoash huetsa jahuéquiboribi ati senen. Jainshonribira aquinti iqui ja teeomabo, isinaibo, jahuen yora iticomá copí teeyamaibo, benomaatabo, yosishocobo betan yoshanshocobo; jainoash jacomma jahuéqui jahuen shinanamain huinotas'h jan jahuéati yamaquetianribi aquinti iqui.

Titaboya jahuen baquebo jahuéquinin mashcóyoracanquetianra aquincanti iqui. Jatiibi baquebora jahuéquinin aquincanti iqui, ja mashcóyoraabobicho, huetsa quesca jonibires inonbi. Jahuen papa onantima baque jainshon papaya baque inonbira aquincanti iqui.

ARTICULO 26.

Jahuequescamabi riqui jatíbi joni quiricanin asheti. Jainoash quirica aquin primaria senenhatira iti iqui, copímabi ati. Jainoash primariain quirica senenhatira teashon baquebo amati iqui. Jahuerato escuelancoqui jato tee meninoshon quirica onanmai, jatíbira jato senenbires onanmati iqui, huetsa quesca jonibo inonbi. Jatíbi jonira huetsa jonibaon acái quescaaribaquín quirica onanti jahuequesmabi iqui, ja bebonbires onantiribi.

Ja requempari escuelancoshon jato onanmatí riqui, jascatas'h benschocaatash jati. Jainshonra jato onanmaribati iqui, jahueratoborin ja huestíorabaon ati jahuéqui jahuequescamabí ishon. Jatian jonibo jacanti iqui, ja asheacana quescatiribí. Jainshonñbira jato asheati iqui jatíbiainoa jonibo, huetsabobires inonbi, jatoiba caquetian jato birestiaquin. Jainoas'h noibamissibi icónon ishon, huetsanconfa joni inonbi jato betan raenanantí iquí; huetsaresibi jonibo inonbí, huetsaresibiashon Dios rabiabo iquenbi, jato jaconhaanti iquí. Jainshonra jato asheanbati iquí escuelancoshon ja Naciones Unidasnin esébo, ja esé iqui, jascatas'h jaconanash jati yoiái esébo.

Jahuequesca escuela inonbi papabaon catóshon jaton queena escuelanco jahuen baquebo imatira jahuequescamabi iqui.

ARTICULO 27.

Huestiora huestiorabora jahuequescamabi iquí, jahuen jemancos'hon jatíbí jahuéqui acasquin aresti, nato pishta ati, tsiniti picoti, ransatí ati, iamash huetsa jahuéquiibo aresti, jainoash huetsabaon acainco queenash ití jan beneti acaincobo; jascarabora jahuequescamabj iqui. Jainoas'h jascaaribi iquí jahuéqui ashenoshon escuelancoshon onanti nato quenéati, dibújantí, behua asheti, jainoash mescó jahuequiibo; jonin jahuen shinananbi acó asheti, jainoash jonin shinaman acótonin jayótiribi.

Huestiora huestíorabaonra jahuen quirica huishaa coiranti j ahuequescamabi iqui, huetsabaon yocatamashonbi jan acóquescaribiaquin huishashon janbi acó yoinaquetian, iamaas'h jahuéqui acó oinnash nocona riqui inaquetian.

ARTICULO 28.

Jarati iqui non apon esé picoa jatíbiain, ja jonibaon aresti shinan, nato Huishacan yoiabo meran icó ati jahuequescamabi inon ishon.

ARTICULO 29.

Jatíbi jonira jaton ja senenhatiabires iqui, jaton jemanconiash. Jascara jaton ja senenhati senenhaira, jainshon jato aresti shinan senenhaira icanti iqui, moa quiquina joni.

Jaton aresti shinan jahuequescamabi anosh, jainoash tsonbi jahueayamati inoshonra, jonibo jaton mainmea apon eséqui coshiti iqui. Ja eséra iti iqui, tsoa joninbi huetsabaon aresti shinan jahuenabicho acasquin masaatima esé. Jainoash ja eséra iti iqui huetsabaon jatíbi jonibo jacommaquin acaitian coiranti esé, jato jascaayamanon ishon. Jainoash huetsabaona iquenbi jatíribibaon j aconmaannaquetian, iamash j aton mainshon iboaá jahuéquiibo huetsabaon jato jaconmaanresnaquetian; j ascarabo jato aquinti.

Quiquinshaman atima jahuéqui riqui, jatíbi jahuéqui aresti jahuequescamabí iquenbi, ja Naciones Unidasnin shinanama quesca atí, ja esé meran yoiái quesca senenhashontima.

ARTICULO 30.

Tsoa joninbira shinantima iqui, iamaash huetsa mainmea joninbira atima iqui shinanquin, nato Huishá meran icó esecanra yoiái, huetsabaon aresti shinan masaanti jatonabicho acasquin, ishon, jahuetianbira jascaquin shinancantima iqui.